

Headlines

- 1 प्रधानमंत्री नरेंद्र मोदी होरें तमिलनाडू च ऐतिहासिक नमें पामबन रेल पुलै दा उद्घाटन कीता। 83 ज्हार करोड़ रुपें दिएं रेल ते सड़क परियोजनाएं दा नीह पत्थर रक्खेआ।
- 2 गृह मंत्री अमित शाह अज्जै थमां जम्मू-कश्मीर दे 3 दिनें दे सरकारी दौरे पर, सुरक्षा स्थिति दा जायजा लैडन ते विकास परियोजनां रम्भ करडन।
- 3 पूरे जम्मू प्रांतै च अज्ज राम नौमी दा ध्यार धार्मिक जज्बे ते जोश कन्नै मनाया गेआ।
- 4 जंगलात मंत्री जावेद अहमद राणा होरें आखेआ जे संरक्षण लेई हीले वक्त दी मंग ऐ।



PM Tamil Nadu Visit

प्रधानमंत्री नरेंद्र मोदी होरें अज्ज पम्बन वर्टिकल सी ब्रिज दा उद्घाटन कीता ते तटरक्षक बल दे ज्हाज गी झंडी दस्सियै रवाना कीता। मोदी होरें रामेश्वरम तांबरम एक्सप्रेस गी बी झंडी दस्सियै रवाना कीता। इस पुल च स्वचलित इलेक्ट्रो मकेनिकल लिफ्ट सिस्टम ऐ जेड़ा इसी 17 मीटर उप्पर चुक्कने च मदद करोग तां जे एहदे हेठ थमां ज्हाज सखल्ला लंघी सकै। पम्बन रेल पुल 550 करोड़ रुपे दी लागत कन्नै तैयार कीता गेदा ऐ ते एहदा रामायण कन्नै गहरा सांस्कृतिक सरबंध ऐ। एह पुल रामेश्वरम गी मुख् भूमि कन्नै जोड़ग। अज्ज राम नौमी दे पवित्र मौके पर प्रधानमंत्री मोदी होरें रामेश्वरम मंदरै च मत्था बी टेकेआ। एहदे अलावा प्रधानमंत्री होरें रामेश्वरम कन्नै जोड़ने आहली 8 ज्हार 300 करोड़ रुपें दी कीमतै आहली कई परियोजनाएं दा उद्घाटन कीता ते केइयें दा नीह पत्थर बी रक्खेआ। इस मौके पर लोकें दे किट्टु गी संबोधित करदे होई प्रधानमंत्री होरें आखेआ जे पिछले 10एं बरें च सरकार नै मुल्खै दियें सारे नुक्करें गी इक-दुए कन्नै जोड़ने लेई ढांचे गी मजबूत करने पर चेचा ध्यान दित्ता ऐ। परियोजनाएं दा उद्घाटन करदे होई प्रधानमंत्री होरें इनेंगी रामनौमी दे मौके पर तोहफा दस्सेआ ते संगम साहित्य च भगवान राम हुंदे जिक्र गी चेत्ता कीता। अपने संबोधन च प्रधानमंत्री होरें साबका राष्ट्रपति अब्दुल कलाम हुंदा बी जिक्र कीता जिंदा जन्म रामेश्वरम च होआ हा। प्रधानमंत्री होरें आखेआ जे साबका राष्ट्रपति अब्दुल कलाम हुंदा जीवन दस्सदा ऐ जे किआं साइंस गी अध्यात्म कन्नै जोड़ेआ जाई सकदा ऐ।



HM J&K

केन्द्री गृहमंत्री अमित शाह हुंदा अज्ज जम्मू कश्मीर दा दौरा पर औने दा कार्जक्रम ऐ। अपने दौरे दरान ओह सुरक्षा स्थिति दा जायजा लैंगन ते सुरक्षाबलें कन्नै गल्लबात करगंन। अपने त्रै दिन दे दौरे दरान शाह होर बीजेपी दे विधायकें कन्नै जम्मू च बैठक लांगन। एह्दे अलावा यूनीफाइड मुख्यालय च सुरक्षा जायजा बैठक ते सलाना श्री अमरनाथ जी दी यात्रा दी तैआरिएं दी बी समीक्षा करगंन। ओह वर्चुअल माध्यम राएं केई सारी परियोजनाएं दा जम्मू कश्मीर च उद्घाटन करगंन ते केइएं दा नीहू पत्थर रक्खगंन।



Navratras-Kanjak Poojan

कटड़ा दिएं त्रिकुटा पहाड़िएं च राम नौमी दे पवित्र ध्याड़े पर श्री माता वैष्णो देवी जी दे दरबार श्रद्धालुएं दी भारी भीड़ लगातार जारी ऐ। नरातें दे मौके पर श्री माता वैष्णो देवी जी दी पवित्र गुफा दी बत्ता श्रद्धालुएं दी सखाल आस्तै हासिल करोआई जा'रदिएं सहूलतें ते सेवाएं बारै दस्सदे होई श्री माता वैष्णो देवी अस्थापन बोर्ड दे मुख् कार्जकारी अधिकारी अंशुल गर्ग होरें दस्सेआ जे इस बारी स्मार्ट लॉकर सरिस्ता शुरू कीता गेआ जेदी बड़ी शैल प्रतिक्रिया थ्होई ऐ।

जम्मू च रामनौमी पूरे धार्मिक जोष ते जज्बे कन्नै मनाई गई। बड़ी मती गिनतरी च श्रद्धालुएं माता दे मंदरें वशेष करी बावे आहली माता दे मंदरै च मत्था टेकेआ। लोक बडुलै मूंह न्हरे थमां गै मंदरें च जा'रदे न ते माता रानी ते भगवान राम दा शीरवाद पा'रदे न। पारम्परिक भजन-कीर्तन आध्यात्मिक वातावरण पैदा करा'रदे हे।

अज्ज श्रद्धालुएं नरातें दे बरत पूरे करियै अपने-अपने घरें च कंजकां पूजियां ते मां दुर्गा दा अशीर्वाद पाया। न्याणिएं कुड़िएं गी कंजक रूपै च पूजने दी परम्परा ऐ जेदे मगरा 9 दिन चलने आहला नराता उत्सव सम्पन्न होई जंदा ऐ। इस दौरान श्रद्धालुएं पैहले रातें लाई दी साख गी बगदे पानियै च परवाई।



Director-Education

स्कूली शिक्षा मैहकमे दे निदेशक डॉ. नसीम जावेद चौधरी होरें जम्मू खित्ते च इक बैठक लाइयै जिले च स्कीमें दी अमलावरी दा जायजा लैता। उनें सरकारी स्कूलें च शैक्षणिक कारकरदगी पर जोर पाया ते राश्ट्रीय शिक्षा नीति 2020 दी सेई ते पूरी चाल्ली अमलावरी लेई बी आखेआ। मनुक्खी संसाधनें दा प्रबंधन, शिक्षकें दी सिखलाई, विद्यार्थिं दी कारकरदगी स्कूल च बुनियादी सहूलतें बारे बी चर्चा होई। मुख् शिक्षा अधिकारी होरें बुनियादी ढांचे ते म्यारी शिक्षा पर जोर पाया।



Rana Forest

जंगलात मंत्री जावेद अहमद राणा होरें जंगली संसाधनें दे संरक्षण ते प्रबंधन लेई किट्टे रलियै कम्म करने दा रौंऽ अपनाने दा आह्वान कीता ऐ तां जे जंगली जीव-जैंतुएं दे संरक्षण ते पर्यावरण माफिक सैलसफा दे विकास पर चर्चा ध्यान दित्ता जाई सकै। एहू गल्ल उनें श्रीनगर च जंगलात मैहकमे दी समीक्षा बैठक दौरान आक्खी। पर्यावरण ते जंगली संसाधनें दी राक्खी लेई जत्रें गी बदाने दी लोड़ गी दिक्खदे होई मंत्री होरें सब्भनें मुतलका धड़ें गी एहदे लेई पूरी पराती ते असरदार रणनीति तैयार करने लेई आखेआ। राणा होरें इस गल्लै पर जोर देइयै आखेआ जे जंगलें दे संरक्षण च मुकामी समुदाय दी अहम भूमिका हुंदी ऐ कीजे एहदे कन्नै जंगलें दी कटाई गी घट्ट करने ते जिमी दा टिकाऊ इस्तेमाल गी बढावा देने ज्नेह लाहू हासल हुंदे न।



NSE-CEO

नेशनल स्टॉक एक्सचेंज दे प्रबंध दिनेशक ते मुख् कार्जकारी अधिकारी आशीष कुमार चौहान होरें कटड़ा च स्थित श्री माता वैष्णो देवी हुंदी पवित्र गुफा च मत्था टेकेआ। अपनी इस जात्तरा दौरान चौहान होरें त्रिकुटा पहाड़ियें च स्थित माता रानी हुंदे दर्शन करियै अशीर्वाद लैता। आकाशवाणी समाचार कन्नै गल्लबात करदे होई चौहान होरें मौजूदा वैश्विक अर्थ बवस्था दे विकास बारै जानकारी सांझी कीती। अमरीका दे राश्ट्रपति हुंदे आसेआ टैरिफ लाने दे तजवीस बारै टिप्पणी करदे होई आखेआ जे भारत पर एहदा असर घट्टोघट्ट होने दी मेद ऐ।



Rajouri-Day

जिला प्रशासन राजौरी दे सहयोग कन्नै सिविल सोसायटी दे सदस्ये अज्ज हफ्ता भर चलने आहले राजौरी दिवस समारोहे दी शुरूआत कीती। अज्ज पैहले दिन समाज च अमन-शांति ते आपसी भाईचारे दा स्नेहा देने लेई ए.एल.जी राजौरी कश शहीदी चौक गुज्जर मंडी च आत्मशुद्धि लेई इक दिनै दा बरत रक्खेआ गोआ। इस दौरान 1947-48 दे ओहके शहीदे गी दिल्ली श्रद्धांजलि बी दिती गेई जिने कबायलिं दे हमले कोला राजौरी गी बचाया हा। 6 म्हीने पाकिस्तानी फौज दे कब्जे च रौहने मगरा 13 अप्रैल 1948 गी 30 ज्हार लोके दिं जे बलिदान मगरा राजौरी आजाद होआ। जिला प्रशासन हर बरै सिविल समाज कन्नै रलियै राजौरी दिवस मनांदा ऐ।



TB-DC Jammu

टी.बी दी बमारी खलाफ जतने गी अगगे बधां दे होई जम्मू दे डिप्टी कमीशनर सचिन कुमार वैश्य होरे छाती दी बमारिं सरबंधी अस्पताल च पौशक तत्व कन्नै युक्त न्यूट्रीशन किट्स मरीजे च बंडियां। एहू टी.बी मुक्त भारत अभियान दा गै इक जतन हा। एहदे च मुख् सेहत अधिकारी होर बी शामिल हे। इस मौके पर बोलदे होई डिप्टी कमीशनर होरे मरीजे गी सेह्दां जीवन शैली अपनाने, नियमित व्यायामक रने पर जोर पाया। इस कार्यक्रम गी जेएंडके बैंक आस्सेआ कोपरेट सोशल रेसपांसिबिलिटी दे तैहत करोआया गोआ।



Enrollment Drive Poonch

2025-26 आले शैक्षणिक सत्र च बच्चे दी बद्धोबद्ध शमूलियत जकीनी बनाने लेई जतने गी तेज करदे होई पुंछ जिले च मुख् शिखा अधिकारी हुंदी अगुवाई च इक व्यापक मुहिम रंभी गेई। एहदे च अध्यापके, विद्यार्थिं ते मकामी समुदाय दे लोके हिस्सा लैता। सरकारी मिडल स्कूल धंत आस्सेआ लोके तगर पुज्ज बनाने लेई इक रैली कड्डी गेई। इस दरान जतने जियां मुफ्त कताबां, वर्दियां, सत्रधार खुराक ते बच्चे अनुकूल माहौल बारे लोके गी दस्सेआ गोआ।

